

O`ZBEKISTON RESPUBLIKASI VAZIRLAR MAHKAMASINING
QARORI

**«O`ZMELIOMASHLIZING» DAVLAT LIZING KOMPANIYASINI TASHKIL ETISH
TO`G`RISIDA**

(O`zbekiston Respublikasi qonun hujjatlari to`plami, 2007 y., 52-son, 539-modda; 2009 y., 21-son, 252-modda; 2011 y., 7-8-son, 62-modda; 2012 y., 28-son, 322-modda; 2013 y., 26-son, 338-modda)

O`zbekiston Respublikasi Prezidentining «Sug`oriladigan yerlarning meliorativ holatini yaxshilash tizimini tubdan takomillashtirish chora-tadbirlari to`g`risida» 2007-yil 29-oktabrdagi PF-3932-son Farmonini bajarish yuzasidan, shuningdek meliorativ texnikaning ko`p profilli mavjud parkini yangilash va shakllantirishni rag`batlantirish, sug`oriladigan yerlarning meliorativ holatini yaxshilash faoliyati bilan shug`ullanuvchi suv xo`jaligi qurilish va foydalanish tashkilotlariga zamonaviy melioratsiya texnikasi va asbob-uskunalari yetkazib berilishini ta`minlash maqsadida Vazirlar Mahkamasi qaror qiladi:

1. O`zbekiston Respublikasi Moliya vazirligi, Qishloq va suv xo`jaligi vazirligi hamda Iqtisodiyot vazirligining davlat unitar korxonasi shaklidagi ixtisoslashtirilgan «O`zmeliomashlizing» davlat lizing kompaniyasini tashkil etish to`g`risidagi taklifiga rozilik berilsin.

O`zbekiston Respublikasi Moliya vazirligi ikki oy muddatda O`zbekiston Respublikasi Markaziy banki foydasining respublika byudjeti daromadiga yo`naltiriladigan qismi hisobiga «O`zmeliomashlizing» davlat lizing kompaniyasiga ustav fondini shakllantirish uchun 5 mlrd so`m mablag` ajratsin.

2. Sug`oriladigan yerlarning meliorativ holatini yaxshilash faoliyati va boshqa suv xo`jaligi ishlari bilan shug`ullanuvchi suv xo`jaligi qurilish va foydalanish tashkilotlariga, shuningdek suv iste`molchilari uyushmalariga va fermer xo`jaliklariga ularning topshirig`iga ko`ra xarid qilinadigan melioratsiya texnikasi, mashinalari va boshqa mexanizatsiyalash vositalarini lizingga berish «O`zmeliomashlizing» davlat lizing kompaniyasining asosiy vazifasi etib belgilansin.

(2-band O`zbekiston Respublikasi Vazirlar Mahkamasining 2013-yil 28-iyundagi 185-sonli qarori tahririda — O`R QHT, 2013 y., 26-son, 338-modda)

3. «O`zmeliomashlizing» davlat lizing kompaniyasiga quyidagi funksiyalar yuklansin:
sug`oriladigan yerlarning meliorativ holatini yaxshilash faoliyati va boshqa suv xo`jaligi ishlari bilan shug`ullanuvchi suv xo`jaligi qurilish va foydalanish tashkilotlari, shuningdek suv iste`molchilari uyushmalari va fermer xo`jaliklarining melioratsiya texnikasi, mashinalari va boshqa mexanizatsiyalash vositalarini yetkazib berish yuzasidan buyurtmanomalarini umumlashtirish;

(3-bandning ikkinchi xatboshisi O`zbekiston Respublikasi Vazirlar Mahkamasining 2013-yil 28-iyundagi 185-sonli qarori tahririda — O`R QHT, 2013 y., 26-son, 338-modda)

O`zbekiston Respublikasi Moliya vazirligi huzuridagi Sug`oriladigan yerlarning meliorativ holatini yaxshilash jamg`armasining kafolat xatlari bilan tasdiqlangan moliyaviy manbalar hamda tender savdolari asosida mamlakatimiz korxonalarida va xorijiy korxonalarda melioratsiya texnikasi, mashinalari va boshqa mexanizatsiyalash vositalarini ishlab chiqarish yuzasidan buyurtmanomalarni joylashtirish;

joylashtirilgan buyurtmanomalarga muvofiq ishlab chiqariladigan melioratsiya texnikasi mashinalari va boshqa mexanizatsiyalash vositalari uchun avans to`lovlarini va uzil-kesil hisob-kitoblarni o`z vaqtida amalga oshirish;

(3-bandning to`rtinchi xatboshisi O`zbekiston Respublikasi Vazirlar Mahkamasining 2012-yil 11-iyuldagi 209-sonli qarori tahririda — O`R QHT, 2012 y., 28-son, 322-modda)

lizing shartnomalari tuzish va sug`oriladigan yerlarning meliorativ holatini yaxshilash faoliyati va boshqa suv xo`jaligi ishlari bilan shug`ullanuvchi suv xo`jaligi qurilish va foydalanish tashkilotlari, shuningdek suv iste`molchilari uyushmalari va fermer xo`jaliklariga melioratsiya texnikasi, mashinalari va boshqa mexanizatsiyalash vositalarini lizingga berish;

(3-bandning beshinchi xatboshisi O`zbekiston Respublikasi Vazirlar Mahkamasining 2013-yil 28-iyundagi 185-sonli qarori tahririda — O`R QHT, 2013 y., 26-son, 338-modda)

melioratsiya texnikasiga, mashinalariga va boshqa mexanizatsiyalash vositalariga texnik va servis xizmatlari ko`rsatishni tashkil etish;

(3-band O`zbekiston Respublikasi Vazirlar Mahkamasining 2013-yil 28-iyundagi 185-sonli qaroriga asosan oltinchi xatboshi bilan to`ldirilgan — O`R QHT, 2013 y., 26-son, 338-modda)

melioratsiya texnikasi mashinalari va boshqa mexanizatsiyalash vositalari xarid qilishga mo`ljallangan resurslarni shakllantirish uchun donorlarning, shu jumladan xalqaro moliya institutlarining mablag`larini imtiyozli asosda jalb etish;

(3-bandning oltinchi xatboshisi O`zbekiston Respublikasi Vazirlar Mahkamasining 2012-yil 11-iyuldagi 209-sonli qarori tahririda — O`R QHT, 2012 y., 28-son, 322-modda)

lizing shartnomalari bo`yicha to`lovlarning o`z vaqtida tushishini nazorat qilish.

4. Belgilansinki, «O`zmeliomashlizing» davlat lizing kompaniyasining ijro etuvchi direktori lavozimga O`zbekiston Respublikasi Vazirlar Mahkamasi tomonidan tayinlanadi.

«O`zmeliomashlizing» davlat lizing kompaniyasining ijro etuvchi direktori maqomi, maishiy ta`minot, tibbiy va transport xizmati ko`rsatish shartlari bo`yicha vazir o`rinbosariga tenglashtirilsin.

(4-band O`zbekiston Respublikasi Vazirlar Mahkamasining 2012-yil 11-iyuldagi 209-sonli qarori tahririda — O`R QHT, 2012 y., 28-son, 322-modda)

5. «O`zmeliomashlizing» davlat lizing kompaniyasi bir oy muddatda Kompaniya ustavini ishlab chiqsin va tasdiqlash uchun belgilangan tartibda O`zbekiston Respublikasi Vazirlar Mahkamasiga kiritсин.

6. Belgilab qo`yilsinki, melioratsiya texnikasi, mashinalari va boshqa mexanizatsiyalash vositalari sug`oriladigan yerlarning meliorativ holatini yaxshilash faoliyatini va boshqa suv xo`jaligi ishlari amalga oshiradigan suv xo`jaligi qurilish va foydalanish tashkilotlariga, shuningdek suv iste`molchilari uyushmalariga va fermer xo`jaliklariga O`zbekiston Respublikasi Moliya vazirligi huzuridagi Sug`oriladigan yerlarning meliorativ holatini yaxshilash jamg`armasi Kengashining qarori asosida 10 yil muddatga lizingga quyidagi shartlar bilan beriladi:

(6-bandning birinchi xatboshisi O`zbekiston Respublikasi Vazirlar Mahkamasining 2013-yil 28-iyundagi 185-sonli qarori tahririda — O`R QHT, 2013 y., 26-son, 338-modda)

a) sug`oriladigan yerlarning meliorativ holatini yaxshilash faoliyatini va boshqa suv xo`jaligi ishlari amalga oshiradigan suv xo`jaligi qurilish tashkilotlari uchun, shuningdek suv iste`molchilari uyushmalariga va fermer xo`jaliklari uchun:

(6-bandning «a» kichik bandi birinchi xatboshisi O`zbekiston Respublikasi Vazirlar Mahkamasining 2013-yil 28-iyundagi 185-sonli qarori tahririda — O`R QHT, 2013 y., 26-son, 338-modda)

lizingga berilayotgan melioratsiya texnikasi, mashinalari va boshqa mexanizatsiyalash vositalari qiymatining 15 foizi avans shaklida ularning o`z mablag`lari hisobidan to`lanadi;

lizingga berilayotgan melioratsiya texnikasi, mashinalari va boshqa mexanizatsiyalash vositalari qiymatining 85 foizi «O`zmeliomashlizing» davlat lizing kompaniyasi tomonidan, unga qarz asosida O`zbekiston Respublikasi Moliya vazirligi huzuridagi Sug`oriladigan yerlarning meliorativ holatini yaxshilash jamg`armasi tomonidan beriladigan mablag`lar hisobiga moliyalashtiriladi;

b) sug`oriladigan yerlarning meliorativ holatini yaxshilash faoliyatini va boshqa suv xo`jaligi ishlari amalga oshiradigan suv xo`jaligidan foydalanish tashkilotlari uchun lizingga berilayotgan melioratsiya texnikasi, mashinalari va boshqa mexanizatsiyalash vositalari qiymatining 100 foizi «O`zmeliomashlizing» davlat lizing kompaniyasi tomonidan, unga qarz asosida O`zbekiston Respublikasi Moliya vazirligi huzuridagi Sug`oriladigan yerlarning meliorativ holatini yaxshilash jamg`armasi tomonidan beriladigan mablag`lar hisobiga moliyalashtiriladi;

(6-bandning «b» kichik bandi O`zbekiston Respublikasi Vazirlar Mahkamasining 2013-yil 28-iyundagi 185-sonli qarori tahririda — O`R QHT, 2013 y., 26-son, 338-modda)

v) melioratsiya texnikasi, mashinalari va boshqa mexanizatsiyalash vositalarini lizingga berish faqat olinayotgan texnikaning mulkiy tavakkalchiligini lizingning butun davri uchun

«O`zagrosug`urta» davlat-aksiyadorlik kompaniyasi sug`urta polisi mavjud bo`lganda amalga oshiriladi;

g) Lizingga beruvchining daromad stavkasi (marjasi) lizing shartnomalari tuzilishi sanasidagi O`zbekiston Respublikasi Markaziy bankining qayta moliyalashtirish stavkasining 50 foizidan ortiq bo`lmasligi kerak;

(6-band O`zbekiston Respublikasi Vazirlar Mahkamasining 2012-yil 11-iyuldagi 209-sonli qarori tahririda — O`R QHT, 2012 y., 28-son, 322-modda)

6-1. Belgilansinki, «O`zmeliomashlizing» davlat lizing kompaniyasi tomonidan o`z mablag`lari, boshqa jalb qilingan mablag`lar (unga qarz asosida Sug`oriladigan yerlarning meliorativ holatini yaxshilash jamg`armasi tomonidan beriladigan mablag`lardan tashqari) yoki boshqa manbalar mablag`lari hisobiga melioratsiya texnikasi, mashinalari va boshqa mexanizatsiyalash vositalarini lizingga berishda lizing muddati va «O`zmeliomashlizing» davlat lizing kompaniyasining daromad stavkasi (marjasi) lizing shartnomasida belgilanadi;

(6-1-band O`zbekiston Respublikasi Vazirlar Mahkamasining 2012-yil 11-iyuldagi 209-sonli qaroriga asosan kiritilgan — O`R QHT, 2012 y., 28-son, 322-modda)

7. Quyidagilar:

«Agrobank» aksiyadorlik tijorat banki — kompaniyaning barcha hisob-kitoblariga xizmat ko`rsatish, to`lovlarning va lizing oluvchilar bilan lizing shartnomalari bo`yicha, melioratsiya texnikasini, mashinalari va boshqa mexanizatsiyalash vositalarini yetkazib beruvchilar bilan yetkazib berish shartnomalari bo`yicha o`zaro moliyaviy majburiyatlarning o`z vaqtida amalga oshirilishini nazorat qilish vazifalarini bajargan holda «O`zmeliomashlizing» davlat lizing kompaniyasining moliyaviy agenti etib;

(7-bandning ikkinchi xatboshisi O`zbekiston Respublikasi Vazirlar Mahkamasining 2012 yil 11 iyuldagi 209-sonli qarori tahririda — O`R QHT, 2012 y., 28-son, 322-modda)

«O`zagrosug`urta» davlat-aksiyadorlik sug`urta kompaniyasi — lizingga beriladigan texnikani sug`urtalash vazifalarini bajargan holda «O`zmeliomashlizing» davlat lizing kompaniyasining sug`urta agenti etib belgilansin.

8. O`zbekiston Respublikasi Prezidentining «O`zbekiston Respublikasi Moliya vazirligi huzuridagi Sug`oriladigan yerlarning meliorativ holatini yaxshilash jamg`armasi faoliyatini tashkil etish to`g`risida» 2007-yil 31-oktabrdagi PQ-718-son qarori bilan tashkil etilgan Sug`oriladigan yerlarning meliorativ holatini yaxshilash jamg`armasi Kengashiga «O`zmeliomashlizing» kompaniyasi tomonidan lizingga beriladigan melioratsiya texnikasi, mashinalari va boshqa mexanizatsiyalash vositalari ro`yxatini tasdiqlash huquqi berilsin.

(9-band O`zbekiston Respublikasi Vazirlar Mahkamasining 2012-yil 11-iyuldagi 209-sonli qaroriga asosan o`z kuchini yo`qotgan — O`R QHT, 2012 y., 28-son, 322-modda)

10. Belgilab qo`yilsinki, mamlakatimizda va xorijda ishlab chiqarilgan melioratsiya texnikasi, mashinalari va boshqa mexanizatsiyalash vositalarining «O`zmeliomashlizing» davlat lizing kompaniyasi tomonidan, shuningdek melioratsiya texnikasi, mashinalari va boshqa mexanizatsiyalash vositalariga texnik va servis xizmati ko`rsatish uchun tovarlar, ehtiyot qismlar va butlovchi buyumlarning «O`zmeliomashlizing» davlat lizing kompaniyasining «Meliomashlizingservis» sho`ba korxonasi tomonidan xarid qilinishi tender asosida amalga oshiriladi.

«O`zmeliomashlizing» davlat lizing kompaniyasi tomonidan xarid qilinadigan melioratsiya texnikasi, mashinalari va boshqa mexanizatsiyalash vositalarini, shuningdek «O`zmeliomashlizing» davlat lizing kompaniyasining «Meliomashlizingservis» sho`ba korxonasi tomonidan xarid qilinadigan melioratsiya texnikasi, mashinalari va boshqa mexanizatsiyalash vositalariga texnik va servis xizmati ko`rsatish uchun tovarlar, ehtiyot qismlar va butlovchi buyumlarni yetkazib beruvchilarni tanlash bo`yicha Idoralararo tender komissiyasi tarkibi 3-ilovaga muvofiq tasdiqlansin.

(10-band O`zbekiston Respublikasi Vazirlar Mahkamasining 2013-yil 28-iyundagi 185-sonli qarori tahririda — O`R QHT, 2013 y., 26-son, 338-modda)

11. «O`zmeliomashlizing» davlat lizing kompaniyasi «Ma`muriy bino maxsus servis» davlat sho`ba korxonasining Toshkent shahri, Mustaqillik maydoni, 5-uy manzilidagi binosiga joylashtirilsin.

(11-bandning birinchi xatboshisi O`zbekiston Respublikasi Vazirlar Mahkamasining 2012-yil 11-iyuldagi 209-sonli qarori tahririda — O`R QHT, 2012 y., 28-son, 322-modda)

O`zbekiston aloqa va axborotlashtirish agentligi «O`zmeliomashlizing» davlat lizing kompaniyasini zarur aloqa vositalari, shu jumladan hukumat aloqasi bilan ta`minlasin.

12. Mazkur qarorning bajarilishini nazorat qilish O`zbekiston Respublikasi Bosh vazirining birinchi o`rinbosari R.S. Azimov zimmasiga yuklansin.

(12-band O`zbekiston Respublikasi Vazirlar Mahkamasining 2013-yil 28-iyundagi 185-sonli qarori tahririda — O`R QHT, 2013 y., 26-son, 338-modda)

O`zbekiston Respublikasining Bosh vaziri SH.MIRZIYOEV

Toshkent sh.,
2007-yil 21-dekabr,
266-son

(1-ilova O`zbekiston Respublikasi Vazirlar Mahkamasining 2012-yil 11-iyuldagi 209-sonli qaroriga asosan o`z kuchini yo`qotgan — O`R QHT, 2012 y., 28-son, 322-modda)

(2-ilova O`zbekiston Respublikasi Vazirlar Mahkamasining 2012-yil 11-iyuldagi 209-sonli qaroriga asosan o`z kuchini yo`qotgan — O`R QHT, 2012 y., 28-son, 322-modda)

«O`zmeliomashlizing» davlat lizing kompaniyasi tomonidan xarid qilinadigan melioratsiya texnikasi, mashinalari va boshqa mexanizatsiyalash vositalarini, shuningdek «O`zmeliomashlizing» davlat lizing kompaniyasining «Meliomashlizing servis» sho`ba korxonasi tomonidan xarid qilinadigan melioratsiya texnikasi, mashinalari va boshqa mexanizatsiyalash vositalariga texnik va servis xizmati ko`rsatish uchun tovarlar, ehtiyot qismlar va butlovchi buyumlarni yetkazib beruvchilarni tanlash bo`yicha Idoralararo tender komissiyasi

TARKIBI

- Kamolov A.S. — Tashqi iqtisodiy aloqalar, investitsiyalar va savdo vazirining birinchi o`rinbosari, komissiya rahbari
- Xamraev Sh.R. — Qishloq va suv xo`jaligi vazirining o`rinbosari, komissiya rahbarining o`rinbosari
- Abdullaev M.R. — Moliya vazirining o`rinbosari
- Shermatov S.B. — Iqtisodiyot vazirining o`rinbosari
- Amonov I.S. — «Agrobank» ochiq aksiyadorlik tijorat banki boshqaruvi raisining o`rinbosari
- Yusupov A.A. — Moliya vazirligi huzuridagi Sug`oriladigan yerlarning meliorativ holatini yaxshilash jamg`armasini boshqarish departamenti direktori
- Sulaymonov A.I. — «O`zmeliomashlizing» davlat lizing kompaniyasining ijrochi direktori
- Qodirov S.Y. — «O`zbekiston temir yo`llari» DAK boshqarmasi boshlig`ining o`rinbosari
- Karimov B.R. — O`zbekiston Respublikasining Xususiylashtirish, monopoliyadan chiqarish va raqobatni rivojlantirish davlat qo`mitasi bosh mutaxassisi

Izoh:

Komissiya a`zolari boshqa ishga o`tganlari taqdirda uning tarkibiga ushbu lavozimga yangidan tayinlangan shaxslar kiritiladi.

(3-ilova matni O`zbekiston Respublikasi Vazirlar Mahkamasining 2013-yil 28-iyundagi 185-sonli qarori tahririda — O`R QHT, 2013 y., 26-son, 338-modda)